



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 8

Aluyimer lenir Jagjit Singh-i lumia longkak aitba anen

Esha Singh-i Buenos Aires World Cup nung silver angu



VOL. XXII ISSUE NO. 173 (ADOK 173)

DIMAPUR

TENTONÜ MONDAY)

RONGCHII (APRIL) 07, 2025

₹ 5.00

Manipur nung Naga lennirtem dak teka sangshirtem aputsüla: ZUCM

Imphal, April 6, 2025

(Agencies): Zeliangrong United Committee, Manipur (ZUCM)-i Manipur Governor dang Kangpokpi district kübok Konsakhul nung Naga nunger lennir ana aser yimdaklirtem dak teka sangshirtem pua arutsü metetdaksüogo.

"Ibala tatalokba ajanga kin o kin tsüngda mangatetep tuluba akümtsü aser Manipur nung lisopurtem asoshi lendong bentsür arutsü" ta ZUCM President Maibon Phaomei-i ashi.

"Parnoki ibala tatalokba manendaksüra, tayang küpzüksü

aser maziöktetba tensa ajurutsü" ta Phaomei-isa ashi.

Kuki nunger kari Naga lennir ana- Konsakhul Village Chief Aimson Abonmei (55) aser Village Chairman D. Adam (45) na dak teka sangshi ta paisa ashi.

"Suspension of Operations (SoO) agreements kübok aliba telungpurtemi iba mapa inyak. Tang Centre sorkar den Kuki telungpur telok 25 tashi SoO nung lir" ta Maibon Phaomei-isa ashi.

Paisa Manipur nung lisopurtem ajak külemi noktaker arürtem anema noktaksü ayongzüko.

Manipur police-i drug shibelener ka Nagaland police ket nung agütsü

Imphal, April 6, 2025

(Agencies): Manipur Police-i arishi kü 38 tain mozü shibelener ka Nagaland Police ket nung agütsüogo.

Iba nisung ya interstate drug transportation case ka nung apu ta Deobarnü ketdangsür kati ashi.

Manipur police anti-smuggling unit-i April 4, 2025 nü J Maikho (38) apu. Pa ya Senapati District kübok Saranamai nunger lir.

Maikho-i Moreh, Manipur nungi Imphal adena Dimapur, Nagaland-i drug shibelenba atema apu.

Iba ken o ya mezüng Nagaland kübok Chumukedima Police Station nung benoka liasü. Iba jagi Manipur police-i Maikho ya Narcotic Police Station, Headquarters, Nagaland ket nung agütsüogo.

Drug supply asürtem ya teimba Manipur nung amenoka lir aser parnoki Assam aser tanga northeastern state temi drugs yoktsü atema Nagaland ya transit route ama amshir ta police ketdangsür kati ashi.

2024 nung Nagaland police-i drug shibelenba indang ken o 199 benoka liasü aser nisung 343 apu.

Assam nung lisopurtemi tanü lungkak aittsü

Guwahati, April 6, 2025

(Agencies): Assam sorkari Assam Rajbongshi nunger nem tribal belts aser blocks nung ali temeten agütsütsü mapa tenzüko saka nübortemi magizüker aser asüng lungkak aitba sentong ka ayongzüka agütsü.

State sorkari Koch-Rajbongshi nunger tashi itdaksütsü atema iba lemtet agi saka lisopur teloktemi magizüker lungkak aittsü sentongtem atongogo.

Assam sorkari District Commissioner ajak dang Koch-Rajbongshi nunger protected tribal areas nung aliba osang tejanga bendentsü tetuyuba ka agütsüogo.

District Commissioner temi Revenue Circle Officers nem iba mapa inyaksü lezmüksüogo.

Iba lemtet ajanga Koch-Rajbongshi nunger protected tribal areas nung ali alitetsü, yoktetsü aser ali yutetsü temeten agütsütsü aser terenlok bener arutsü ta bilemer. Ajisüaka, Assam nung lisopur telok aikati

iba lemtet magizüker.

Assam nung lisopurtem taginüba aser ali temetentem kümzüka ayutsü atema tribal belts aser blocks ya tentetba lir ta parnoki ashi.

"Assam nung protected tribal belts aser blocks nung ali vbogha lakh 4 shi atsünga agiogo" ta Tribal Sangha secretary Aditya Khaklari-i ashi.

Assam sorkari state nung lisopurtem yutsür tangar temeten atema ang temulung agütsür aser iba ya ali kibur agentsü atema tasa atonga inyakba ka lir ta pai ashi.

"Ali atsünga agirtem ket nungi ali meyipa agütsü melena sorkari lisopurtem temeten agentsü meranger" ta Khaklari-isa ashi.

Koch-Rajbongshi nunger ama non-tribal communities nem reserved areas nung ali alizüksü temeten agütsüba ya lisopurtem temeten alema inyakba mapa ka lir ta paisa metetdaksü.

State sorkar lemtet anema lisopur teloktemi April 7, 2025 nü state ajungalen lungkak aittsü ayongzüko.

Longwa Angh-i Indo-Myanmar arrtsü atsü dangba magizüker



Chief Angh (King) Tonyei Phawang

Kohima, April 6, 2025 (TYO): India sorkari arrtsü atsü dangtsü lemtetba magizüker ta Chief Angh (King) Tonyei Phawang-i metetdaksüogo.

Phawang ya Myanmar den international border ajanga lemdanga aliba yimtsüng 35 madak Angh lir.

Mon district kübok Longwa yimtsüng nung par kidang osangbener den jembidang arishi küm 49 tain Phawang-i "pa yimsütsüba kübok yimtsüng 35 lir aser 30 Myanmar tsütsü aser pungu India tsütsü lir" ta ashi.

Phawang aliba yimtsüng Longwa ya-a India aser Myanmar nung anasü lemdanga lir.

"Ni aliba ki ya putu aika tejakdang yangluba liasü aser mezüngbo azüki yanglu saka kasa kimung nung 2016 nung RCC ki yanglua lir. Ajisüaka, India nüjiso

anguba sülen kü kimung imaginary boundary post ajanga India aser Myanmar tsüngda lemdanga lir" ta pai ashi.

Arrtsülen anatsülen alirtem ya Konyak Naga nungertem lir aser onok ya kibong ka ama dang alir. Yimtsüng 35 tsüngda onok yaritepa aluyimba nung mesüra tanga maparen inyaka arur ta Chief Angh Phawang-isa ashi.

"Ozü kidang senzügenbonga ya-a international lir anungji item kulitem yutsür kodaser India sorkari arrtsü atsü dangtsü meranger?" ta pai asüngdang.

Myanmar nung aliba Konyak nungeri parnok kidang nüngdakbatem atema yangi arur. Parnoki Mon jila nung shishilembatsü atema tezübaba lir aser parnok chimurtem yangi school pungu nung azüngtsü atema arur. School tem rongnung ana sorkari lapokba lir aser

Myanmar nung parnoki ibala facilities mangur" ta Phawang-isa ashi.

Centre-i FMR agentsü aser arrtsü adena senzütsü atema pass amshitsü lemtetaka tang tashi nungbo akangakanga mebenshir, saka benshira Konyak Naga nunger kanga timtemtsü, ta paisa metetdaksü.

"Iba ya kanga dang tim masü anungji Chief Angh ka ama Centre-i iba lemtet meyipa reprangshitsü aser nübortem asoshi bilemstsütsü imlar" ta paisa shisem.

"Centre-i tang tamshidak kilometer 16 Free Movement Regime (FMR) ajema akümtsü melena Konyak Naga nunger atema ulushitsüla, talisa iba ya Longwa yimli nung asütsüla" ta Phawang-isa metetdaksü.

"Longwa nung Assam Rifles personnel mapa lezmüksüba atema tenüsang agütsür. Iba ajanga international border adena ozüng alema senzügenbongertem noktangtsü aser free health services o medicines ajanga yimdaklirtem yaritsü" ta Chief Angh-isa ashi.

Arrtsülen anatsülen alirtem tsüngda mepetmesü kecha mali aser yimjung nung dang liyonga arur. Anungji Centre sorkari arrtsü atsü dangtsü lemtetba ya meyipa agütsüla aser tetsükdaksü kecha melii free movement regime lidaksütsüla, ta Tonyei Phawang-isa metetdaksü.

PM Modi-i India nung mezüngbuba Vertical-Lift Sea Bridge lapoktsü

New Delhi, April 6, 2025

(Agencies): Prime Minister Narendra Modi-i Deobarnü Tamil Nadu nung New Pamban Bridge lapoktsüogo. Pai Ram Navami benjung nung India nung mezüngbuba vertical-lift sea bridge lapokja liasü.

PM Modi-isa Coast Guard ship ka aser Rameswaram-Tambaram (Chennai) train sayatsüogo.

PM Modi-i anogo asemnü Sri Lanka semdangba sülen tanü Tamil Nadu tonga aru. Pai Rameswaram nung Ramanathaswamy temple nung puja asüba sülen Rs 8,300 crore alang mapatongtem atema lung azünga yutsüogo.

Tamil Nadu nung Palk Strait ajanga kilometer 2.07 talang apu ajanga India-i engineering tsütsü mapa tulu inyakba kuli agütsür, ta Ministry of Railways-i metetdaksü.

Iba apu ya Ramanathapuram district nung lir aser



Rameswaram Island den Mandapam sendakteper.

Iba apu ya Rail Vikas Nigam Limited (RVNL) ajanga Rs 700 crore endoka yangluogo. Iba apu nung 72.5-metre navigational span lir aser iba ya metre 17 tashi ajungketer tsünglanglen rongtem süiteter.

Iba apu nungsa railway tracks ana lir saka tang single line nung dang senzür. Iba apu ya küm 100 atema yangluogo ta sorkari

metetdaksü.

Pamban Bridge ya USA nung Golden Gate Bridge, UK nung Tower Bridge aser Denmark o Sweden tsüngda Oresund Bridge den medemdanga züngshir.

Pamban Bridge tejenbaji 1914 nung British engineers-i yangluba liasü. Iba apu nung manually operated Scherzer's span (a type of rolling lift bridge) benshia liasü.

Dimapur Yachem Bühü Pangthai pur Moonyiü benjong amung



Dimapur Yachem Bühü Pangthai Moonyiü benjong April 5, 2025 nü amungdang tangokba noksa ka nung S. Yongchang Phom, S. Pangnyu Phom aser dangartem angur.

Dimapur, Rongchii/April 06 (TYO): Phom Moonyiü benjong tenzüker pongunü buba nung Dimapur Yachem Bühü Pangthai ajanga April 5, 2025 nü Eralibill Village, Dimapur nung taoba minister S. Pangnyu Phom'er kidang aliba Morung nung Moonyiü sentong balaka ayongzüka liasü.

Iba sentong ya Dimapur nung aliba Gazetted Officers of Yachem ajanga ayongzüka liasü.

Iba sentong akhumdong ka ama S. Yongchang Phom, Director Agriculture, Nagaland,

Kohima ajanga tayongzüka o jembidang arok asoshi bilemtsü, dangar dang temeim sayutsü aser arok terenlok asoshi tenzüksü ayongzüka liasü.

Pai lanurtem dang tain temi mapa tajung inyaka yutsüba mesamadaktsütsü aser lenla ajunga nung temelenshi tajung bener arutsü asoshi saksalema aser tasü ita inyaktsü ayongzü.

Sentong tenzüka Y. Konnyei, Home Evangelist, PBAD ajanga sarasadem, tir O. Yanger Phom ajanga pela agizükba o jembi aser C. Hamba Nemdakly

ajanga iba benjongmung ratet shia liasü.

Maneni Dimapur Yachem Anüti Lunglak ajanga sobaliba ken ka aten aser Dimapur Yachem Students' Union ajanga Moonyiü tenzüka indang saya ka agi shilem agia liasü.

Iba sentong nung O. Hamshong aser Enyuh na menden liasü aser M. Nyeiphen, Fellowship incharge ajanga sarasadema sentong tembang aser iba sülen indigenous games aser Moonyiü Feast liasü.

Mon jila nung Pathkind Collection Center semzük



Mon jila nung April 5, 2025 nü Pathkind Collection Center semzükdang tangokba noksa ka nung MLA Mankhao Konyak den Minister CL John, Advisor Konngam Konyak, MLA Nyamnyei Konyak, MLA Manpon Konyak aser dangartem angur.

Dimapur, Rongchii/April 06 (TYO): Mon district nung aliba nübur nem healthcare diagnostics temelaba nung agütsütsü atema April 5, 2025 nü Mon jila nung Pathkind Collection Center semzüka liasü.

Iba Center ya National Accreditation Board for Testing and Calibration Laboratories (NABL) accredited lab indang Pathkind Laboratory aser Eastern Diagnostic Center, Mon town lungjemba lir.

Iba Center ya Mon jila nungi MLA Mankhao Konyak-i semzüksü, kong Minister, Environment, Forests &

Climate Change, CL John; Advisor, Treasures & Accounts and Art & Culture, Konngam Konyak; MLAs Nyamnyei Konyak aser Manpon Konyak nunger dena liasü.

Iba sentong nung Wennyei Konyak, Resident Commissioner, New Delhi; Dr. Hentok Phom, Joint Director and State Nodal Officer (Health & Family Welfare), New Delhi aser Dr. Supongmenla Walling, CMO, Mon district nungertema dena liasü.

Pathkind Collection Center ya NABL ajanga accredited süa lir, anungji diagnostic services jenjang tajungba nung

agütsür. Iba lab nung machines tasentem lir aser certified pathologists aser technician tem lir.

Pathkind nung health check-up packages balala den oncology, neurology, gynaecology, nephrology amala tendangba lir Iba lab yagi shiranger ki tonga oa home collection services agütsütsü.

Center nükjidong ya Mon district nung healthcare services tajungtiba kumdaktsütsü, diagnostic services quality tajung agütsütsü aser shirangertem temang anepalutsü asoshi tesem balalai aoba ajemdaktsütsü.

NSLSA-i Kohima nung State Mega Legal Services Camp ayongzüksü

Kohima, Rongchii/April 06 (TYO): Nagaland State Legal Services Authority ajanga Government of Nagaland den lungjemer April 12, 2025 nü NBCC Convention Hall, Kohima nung anügdang 12:00 ako nungi tenzüka State Mega Legal Services Camp ayongzüksü.

Welfare legislations aser schemes indang awareness agütsütsü, welfare schemes jangjatepa nüburtem den sendakteptsü aser nüburtem nem legal tsütsü tebilemtsü ajurua aliba nung lenmang sayutsü nükjidong nung iba Camp ya ayongzüksü.

Legal Services Authority Act, 1987 indang Section 4(e) nung shia aliba ama Legal Services Institution indang tongtipang inyakyim kaji tajemzüka jenjang nung alir nem shisatsü agüja welfare scheme aser programmes balala kübok pei temeden aser tata ngudaktsütsü asoshi lir.

NSLSA yagi Legal Services Authorities, district administration, government departments, stakeholders aser NGO den lungjemer Nagaland nung mezügbuba Mega Legal Services Camp ya Longleng District nung May 2018 nung tenzüker aser Kohima nung February 2019 nung tembanga liasü.

Department balala ajanga services agütsüba den külemi iba mapang photocopying, affidavit, help desk for filling up the forms, legal awareness stall, distribution of legal literature, tajemtsü tzü aser transportation facilities angati agütsütsü.

Facility balala agütsü atema nüburtemi pei meyong kuli kaket tem bener arutsü metetdaktsür.

Sentong nung Ministry of Law & Justice, Govt. of India, Supreme Court of India, Gauhati High Court, National Legal Services Authority aser sorkar department balala adentsü.

Patkai Christian College nung Annual Cultural Day amung



Dimapur, Rongchii/April 06 (TYO): Patkai Christian College (Autonomous) pur küm shia amungba Annual Cultural Day sentong April 5, 2025 nü "Interweaving Cultural Threads" omen nung ajemdanger tejangraba tulu aser telungjem nung mungogo.

Iba benjongmung tenzüka anepdang "Mekhala Marathon" session agi, kong sobaliba aser state balala nungi tetsür temi shilem agia liasü.

Sentong akhumdong Dr Inato Y. Shikhu, PhD. Scholar and Senior Fellow, CCRT (Centre for Cultural Recourses and Training), Union Ministry of Culture aruba sülen formal session tenzüka liasü.

Iba sülen College Chaplain-i anir temoatsü jazüka sarasadema liasü.

Naroyemla Chang, Cultural Secretary, Post Graduate Students' Welfare Council (PGSWC) ajanga pela agizükba o jembidang, kin balala süaka telungjem nung alitsü tongtipang ta ashi.

"Kin balala indang kisüng masü saka mesüktepa aliba indang benjongti," ta lai ayongzü.

N. Sadangmong Chang, Literary & Cultural Secretary, Students' Union Patkai Christian College (SUPCC)

ajanga tongti tesemdanger nem tepela temaitsü sayua liasü.

Dr Shikhu ajanga tayongzüka o jembidang, sobaliba senmang indang rateta ashi aser "Sobaliba tera tanglokba ya akhi yimsü indang shisatsü anguba nungi tenzüker," ta ashi.

Sobaliba yimya buraloka mamshitsü pai ayongzüka liasü.

"Sobaliba tesendaktep ya oshioben aser asen sobaliba indang shisatsü nungi tenzüker aser ibaji kanga tongtipang lir," ta pai ashi.

Formal session tembangba sülen sobaliba ken, tsüngsang, jilushi, washitepba, aser otsü ashiba amala nung tetoktepba agia liasü.

Kaketshir temi ethnic show nung pei sobaliba sübusolemtsü tem agir kin aser state balala indang ayak sayua liasü.

Iba anogomung nung 'hopping', tsüksü sepdokba, an apuba, traditional fire making, an tepong mechitepba, ak shit emo aser King Chilli achiba, obstacle racing, aser Naga wrestling nung tetoktepba liasü.

Ano sobaliba nung ajemdaker mobile phone photography agia liasü aser iba anogomung nüngtem nung kin aser state balalai arju yanglua liasü.

Modi, Sri Lanka tir nati railway project tem amenoktsü



New Delhi, Rongchii/April 6 (Agencies): Ato Kilonser Narendra Modi aser Sri Lanka tir Anura Kumara Dissanayake nati Deobarnü Anuradhapura yimti nung India-i teyari agütsüba railway project ana amenoktsüogo. Iba ajanga SL nung transportation sector ajungkettsü atema New Delhi-i teyari agütsüba sayur.

Linük ana tsüngda energy aser defence nung tesendaktep akangshitsü atema tenangzüktepba balala tembanga yangluba sülen lenir ana yagi linük ana tsüngda tamangba yimsü aser sobaliba tsütsü sendaktepa aliba dak rangloker Anuradhapura nung Jaya Sri Maha Bodhi temple semdang, koba world heritage tesem ka aser Asia nung yimti tejentiba rongnung ka lir.

Modi aser Dissanayake nati 128-km Maho-Omanthai railway line semzüktüsüba sentong nung shilem agi, koba India-i USD million 91.27 agüja yanglushiogo.

Tenatisa, India-i USD 14.89 agüja Maho nungi Anuradhapura tashi advanced signaling system ka yanglutsü aliba sentong amenoka liasü.

Bilateral development partnership kübok iba railway modernisation project tem ajanga Sri Lanka nung north-south rail connectivity tashitaitba akümtsü atema teyari agütsütsü ta India nunger ketdangsürtemi ashi. Item project tem ajanga passenger aser freight traffic linük ajanga kanga kara senzüsenpongtsü atema teyari agütsütsü.

"Tesendaktep akangshia Anuradhapura nung tir Anura Kumara Dissanayake küinati Maho-Omanthai railway line yanglushir aliba ka semzüktüsüogo," ta Modi-i social media post ka ajanga ashi.

"Maho-Anuradhapura section nung advanced signalling aser

telecommunication system amenoktsü atema signalling project-a amenoktsüogo. Sri Lanka terenlok atema lenla balala nung teyari agütsüba atema India kanga nema adanger," ta paisa shisem.

India-i, terenlok maparen balala aser talisa railways sector atema EXIM Bank ajanga Sri Lanka nem USD billion 2 dak tema sen aputsüogo.

Iba inyakyim nung coastal railway track ajungkettsü atema USD million 167.40, northern railways ajungkettsü atema USD million 800 aser passenger coaches, rolling stock aser signalling system tem atema USD million 318 aputsüba densema lir.

Deobarnüsa lenir ana yagi Jaya Sri Maha Bodhi temple-i semdanga Mahabodhi süngtongzüng nung sarasadema liasü. Iba süngtong ya Sangamitta Maha Their-i third century BCE nung India nungi Sri Lanka-i bener aruba Bo sapling ka nungi ainba ta amanger.

Sangamitta, shiba Buddhist nun ka aser Emperor Ashoka jala tantsüla liasü, la aser la adianu Mahinda ya Buddha tesayuba prokshitsü atema Sri Lanka-i oa liasü.

Lenir ana yagisa iba shrine nung head monk dang nungi temaotsü agi aser tanga monk tem den sensaksema liasü.

Kümtem tsüngda India-i Nepal, Sri Lanka aser Thailand densema parnok meket aliba linüktem den Buddhist tesendaktepba ka yanglutsü meranga arudar, koba China-i South aser Southeast Asia nung Buddhism amshia parnok inyakyim atsülangtsü merangba nem telangzüba agütsütsü asoshi inyakba nung shilem ka lir.

2022 küm Modi-i India aser Sri Lanka na tsüngda Buddhist tesendaktep ajungkettsü atema USD million 15 agütsü. Iba inyakyim kübok mezüngbuba

project ji USD million 10 intoka Buddhist shrines ka solar electrification asüba liasü. Taoba küm India-i Buddha indang temeshi relic tem Thailand kübok tesem balala sema bener senzütsü atema yoka liasü.

Modi ya Anuradhapura nungi indang indanga Tamil Nadu-i ao kong pai project ishika semzükjia liasü.

Ato Kilonseri Deobarnü New Pamban Bridge semzüktüsüogo, koba India nung mezüngbuba vertical lift sea bridge lir. Paisa, Ram Navami amungba anogo Rameswaram-Tambaram (Chennai) train service tasenba lapokja liasü.

Pamban Bridge tasenba yagi Rameswaram aser mainland na sendaktepdaktsür. Iba apu ya sen crore 550 dak tema intoka yanglu, koba km 2.08 talang aser 72.5-meter vertical lift span ka lir. Iba lift ya meter 17 tashi ajungketteter aser iba ajanga rong tulutem ayong ayonga süütsü melaba den train-a kecha tetsükdaktsü makai senzüsenpongter.

Apu ya stainless steel agi yanglu, high-quality protective paint nüa lir aser telokteptem ajak weld süa lir. Iba apu ya mapang talangka amshitetsüsa akang akanga yangluogo aser anepalutsü atema senotsü aikabo mintoktsü.

Mezüngbuba Pamban apu ya British engineers temi 1914 küm yanglu. Iba apu ajanga Rameswaram asetkong ya mainland den sendakteptsür. Aso aika iba apua ya temeshi ainei aoertem, alima penzürttemi amshiba den shishilembatsü atema-a amshiogo. Ajisüaka nüngdak tali akümba ajanga apu yanglushitsüsa aküm aser sorkari 2019 küm apu yanglushitsü agizüka liasü.

Ministry of Railways kübok Navratna PSU, Rail Vikas Nigam Limited (RVNL)-i iba mapa ya agizüka inyaka liasü.

Aluyimer lenir Jagjit Singh-i lumia longkak aitba anen

New Delhi, Rongchii/April 6 (Agencies): Punjab nunger aluyimer lenir Jagjit Singh Dallewal-i lumia longkak aita aliba Deobanü anenogo. Aluyimertemi jangotsü atema minimum support price (MSP) asoshi legal guarantee ka densema takhangba balala agütsüba ataloktsütsü khanga pai taoba küm November ita nung lumia longkak aita liasü.

Longkak aitba osang ya pai Punjab kübok Fatehgarh Sahib district nung Sirhind tesem nung 'Kisan Mahapanchayat' sentong ka nung sangdonga liasü.

"Nenok (aluyimertem) ajaki ni tasü tonga lumia longkak aittsü aliba anentsü shiogo. Longkak aitba sentong achaayangba atema nenok dang kanga pelar. Ni nenok tebilemba akümtsübur. Nenoki tetuyuba agütsüba ni agizüker," ta Dallewal-i sentepa aliba lokti den o jembiba mapang ashi.

Union agriculture minister Shivraj Singh Chouhan aser union minister of state for railways Ravneet Singh Bittu nati lumia longkak aitba anentsü mepeshiba sülen anogo ka lir pai iba telemetba agia liasü.

Samyukta Kisan Morcha

(Non-Political) aser Kisan Mazdoor Morcha (KMM) na longjemer tentetba lokti tentet nung Jagjit Singh Dallewal ya lenir tejen ka liasü aser pai taoba küm November 26 nü nungi aluyimertem takhangba pusema mapang telatet ka makai lumia longkak aittsü telemetba agia liasü. January ita sensaksema sülen pai medical teyaribo agi tenzüik saka pai tang tashi longkak aita liasü.

Union minister of state for railways and food processing, Ravneet Singh Bittu-i Honibarnü Bittu dang lumia longkak aitba anena centre den sensaksem nung shilem agitsü mepeshia liasü. "Nü health ajak dang tongtibangba aser nü taküm ya Punjab nunger atema kanga senti lir, kechiyong aluyimertem inyakyim balala atema nü lenisüba teti nüngdaktsü," ta Bittu-i video osang ka ajanga ashi.

Paisa, BJP minister aser lenir tejentemi Lok Sabha session mapang Dallewal health indang asüngdangogo, ta ashi. "Ni centre sorkar aser Punjab nunger tenüng nungi iba temepishiba ya agütsür," ta Bittu-i ashi.

Amit Shah-i election agitsü aliba state tem semdangtsü



New Delhi, Rongchii/April 6 (Agencies): Union home minister Amit Shah-i election agitsü aliba state Tamil Nadu iba ita tatemlen semdanga All India Anna Dravida Munnetra Kazhagam (AIADMK) lenirtem den sensak asemtsü, ta ken o jangja alirtemi ashi.

Shah-isa, Bihar semdangtsü kong taküm küm tatemlen election agitsü lir. Ano pai West Bengal semdangtsü kong 2026 küm election agitsü lir.

Party-i pa alliance atema sensaksemtsü asoshi Tamil Nadu semdang masü ta shiogo, saka minister yagi state nung AIADMK lenir tejentem ajurutsü akok, kong 2026 küm election agitsü lir.

March ita AIADMK lenir Edappadi K Palaniswami-i linük yimtiba nung Shah ajuru aser iba ajanga Bharatiya Janata Party (BJP)-i TN nung election magi tsüngda AIADMK den longjemer sorkar kümteter aliba party Dravida Munnetra Kazhagam (DMK) den tokteptsü akok ta bilema liasü. "Pai Rashtriya Swayamsevak Sangh (RSS) ideologue S Gurumurthy aser party lenir kar den sensaksemogo," ta ken o jangja alir kati ashi.

AIADMK den tesendaktep

yanglushitsü atema state lenirtem kari centre nung lenirtem nongshidar.

"Alliance ka yanglutsü atema party anaprongla nungi lenirtem aiben senden menogo aser state nung lenirtem melenshitsü lia osang kabo sangdongtsü imlar," ta party lenir kati ashi.

State tir K Annamalai-i mapa toktsüba mapang pa melener shiba shimtsü aji ajaki yongya atadar, kechiyong party ana longjemtsüba ya state lenirtem tesendaktepba dak keta lir. State tekolakba ya mapang tatsüka tsüngda sangdongtsü imlar.

BJP aser AIADMK nungi lenirtem kari, party ana longjem nungdang DMK atsüngtoktettsü ta amanger.

Kasa mapang nung Shah-i iba ita tatemlen Bihar semdangtsü imlar, kong NDA kübok BJP aser parnok den sendaktepa aliba party tem election nung tokteptsü lir.

Maneni pa West Bengal semdangtsüba mapang tatsüka tsüngda sangdongtsü. Party kübok inyaktertem ajungmesotsü aser election atema nüboyimba sentong asoshi tetuyuba agütsütsü atema pai iba state semdangtsü.



TIR YIMYIM
YIMOBILEM (EDITORIAL)

DIMAPUR MONDAY, APRIL (RONGCHII) 07, 2025

Shah o Rioba na mapa

Naga yimten tebilemstü tatem kuma latetstü asoshi ken o jembitsü atema India kilo kilonser Amit Shah-i ajaba atar ta yakanü Mon nung osangbenertem den jembia dang chief minister Neiphiu Rio-i ashiba o nung angatetba agi, Naga yimten tebilemstü ya tangsabo telatetba ka dangi marutetstüa akok, kechiyong Amit Shah-i Naga yimten tebilemstü latetstü atema kanga süoki ia bilembabo mangur. Aji oda, Manipur nung atalokba tebilemstüa mekoktetba nisung kati küm noklang dak tali jembia aruba yimten tebilemstü ka tatem kuma latetstüsübaji temelabo masü aser teimlaa meimlar. Atangji, latetstüli lanli, saka Nagaland government-i anir Naga yimten tebilemstü latetstü asoshi luden ka tentetli Naga yimten nüchiso bushir telokang ano talila kümli ta tangbo Naga nunger nübortemi parnok asoshi yimten nüchiso bushitsür NNC telok kwi aser NSCN teloka kwiar meshitetka kümogo. Aji oda, Naga yimten tebilemstü tatem kuma latetstü asoshi Naga nunger yimten nüchiso atema rarar teloktem den Nagaland government nung S.C.Jamir leniba mapangbo kecha telok dena tesendaktep meyui 'equi-distance' jenjang nung lia aru, ajisüaka tangbo jet ta meyiper Rio mapang nungbo Naga nunger yimten nüchiso asoshi rarar telok ajak den tepila meyui kasasa tesendaktep lia 'equi-closeness' jenjang nung lia arur joko küm metsü jungogo. Ajisüaka, Naga nungerbo pilaa alia majung aser anasatepa külemi alia majung ta taoba mapang pilaa aliba mapang dang nungibo, ano, tang külemi aliba mapangang teraksaba aser melongjemba kümer asenok Delhi nungi pi ajaba ataa amongtsübaji, Naga nunger asoshi ken o tembanga jembitsü renemshiba mapang masü saka ano tali meputep adoka raksaba mapangang ka asütsü. Aji oda, asenok tebilemstü latetstü asoshi India-i ajaba atadang asenok Naga yimten otsübo mejembiba – mejembiba kümdagi. Aji oda, Phizo nunger mapangbo tetsüng agi Naga lima sema oagi yimtaklirtem ajurua Naga yimten temeten indang tangatetba agüja shisalemtepa jaja saka tanübo telokang aika aküm ashi, Naga yimten temeten indang jembir Naga yimten nüchiso asoshi rarar telok aser Naga yimten lenir shinga mali kümogo. Iba jagi Naga yimten otsü ya Phizoba nunger mapang jembiba agi tera angazüka jembir taintem dak alaka tanü asüng lanur aser kaketshirtemibo Naga yimten temeten indang temeteta memetet aser tejangraa mejangrai kümogo. Aji oda, tanü putu nung alirtem asoshi Naga yimten temeten otsüji Naga nunger lim aser Naga nunger yimten temzüng özüng balaka lateta yur Naga nunger mulungba nung Naga nungertemi yimsü asütsüba temeten aser otsü masü saka tashiyim agi India nunger election nung Naga yimten nüchiso asoshi rarartemi shilem agiba aser tashiyim agi sen sarur telok mapa aser otsü amai ka dang kümadokogo. Ashiko, iba jagi Naga nunger lanurtem Naga yimten nüchiso asoshi raratsü jangratsü melen India sepai akümtsüang jangrar südi. Aji oda, kanga dang shisabolutsü kaji, Delhi nungi asen yimten ken o jembitsü atema aja atadang, Naga yimten nüchiso asoshi bendanga agüja nokdaker chirnurtemang ,ano, India yimten kübok Indian election aser Indian Civil Service nungang shilem agitsüsa kümra, Delhi nungi majadang Naga yimten ken o tembangadoker asütsü. Ashiko, Delhi nungi ajatsü purtem jagiang asenok yimten tiaji tejangjaba nung meteta repranga alitsüa akok. Aji oda, ashir dang ashi, Delhi nung alirtem jagia asenok telok paika rongnung ya shiba jar shiba majatsü ? Anungji, Delhi nungi tajaba atadang, Nagaland chief minister-bai anir Naga yimten ya shitakba tatem kuma latetdi süra, tamasa Kohima nung Naga nunger tangatetba aser tebilemba ka kümatsüla . Joko, koda asütsü asenoki maginüyonga Naga yimten tebilemstü ken o ya India den jembitsüsa akümer, ajisüaka Naga nunger yimten nüchiso bushiba tenüng nung akümba NNC aser NSCN telok paika ya tangatetba aser tebilemba ka dangi arua kenbang obang medemdaktsüsübajibo Amit Shah mapa masü Rioba mapa asütsüla.

OLEMSABANG

ASENOKIASENLIMATEMENUNGRATSÜLIMA
KAKÜMAYANGLUDI

~ L. Kika Pongener

1960's mapang tashi ka nung Ao lima yimtsüngtem ajunga nung yimdaklirtem teimba ka alu meranga yima takar küma alir kibong aika liasü, oda karbo tsük chen ana-ase m tashi sunga tokoka yur alirtem liasü. Ano tanüngba kibongtema aika küm nungi küm renteta pei kibongpo peria/tepok sunga chiyunga alirtem liasü. Ajisüaka, kanga tesasatsüka, tanü putu nung asen Ao lima nung yimdak alirtem aika asen tsüraburtem ama-to alu meranga ayimer maliba angudang kanga sasaa bilemer. Ano ajidang masü, Ao lima yimtsüng aika nung kibong/kilen kanga ajema küma aoba angur. Akhi mapang tsürabur kibong nungi jabaso/jalatem kibong tasen küma razüka aortem ajungaji pei yimdak dang ali, yongji küm shia kibong/kilen talila sukloka aoba agi yimtsüng shia kilen tali renloka ao. Ajisüaka, tanübo jabaso/jala kwika kibong küma razüka aor, ajungaji jila nungang oa alitsüsa tensa mapang ka kümogo. Ano aji dang masü, tanüngba kibongtem rongnungjia karbo jila nungang oa shishilempa-a alitsü, aayanga alitsü, sorkar mapa aser private sector nung mapa inyaka alitsü atema yim toktsür aoba angur. Iba amala küli jagi tanü putu nung Ao lima yimtsüngtem aika nung kibong/kilen akhidang aliba dang nungi kanga ajema küma aoba angur.

Ajiser, yimdak alir tanüngertemji teimba ka akhidang ama-to alu meranga yima alir züngteta dang lir, aserbo teimba ka aayanga, hajira oa alirtem asütsü sudi. Aji oda, asen Ao lima yimtsüng ajunga nung amai, yimdaklirtem asen tsürabur ama-to meranga alu ayimer mali, kar dak alaka teimba ka jila nung alir takar-tulur dak nendaker aliba angudang kanga sasaa bilemer. Ano teimba ka Assam lima Mariani o Amguri jila nung jangpong yur alirtem angudang kanga sasaa bilemer. Aji oda, Assam nunger den rara menar mesura lendong kar ataloker Assam nungeri shishi-i maludaktsüi ita ishika shibang nungpo ayawara arutsüsa asen Ao lima yimtsüng aika iba jenjang aser tia nungji lir. Shitakba jembidi sura toztü sapon aser metsü (Salt) dak alaka tanga tanügbajibo asenoki asen lima nung pei sasa züsenteta chiyunga-jema litettsüsa asen lima nung ali-arem peria dang lir.

Aji oda, tanü putu tensa agi yimdak yimtsüng dang nungi jila nung alitsübaji maparen aika nung kanga temelaba aser kechisarena ajak nung kanga anitesungzükba asüba agi pei tetsü taso-lima liaka aikati jila nungang oa linur sudi. Ano Mokokchung town nung alir kibongtema aika pei ki tajung yanglur jangradema lia aliba, kimong den ki dena yokdoker Dimapur nungang alua alitsü sentong atongba kibongtem karbo ngua aruogo. Ano servicewalla-tema kadang Pension ngudir pei tetsü taso-lima bushia aotsü melena ajungai Dimapur & Kohima jila nungang alitsü kimong-lumong alir. Aji oda, tang amaisa aonungpo, putu ka-ana sulenbo Ao lima yimtsüng ajak nung ya amitsür-sangremer aser tantsür-tambur haji-hakok leni-maor kar dang anungtsü sudi ta nuklai arur. Atangji, putu ka-ana sulenbo aturar kibongtem ajungai pei tetsü taso-lima toktsür jila bushia senshir pei yimdak telinur mali küma aotsü amai nukla nung angur. Anungji Ao lima ajak nung yimden yisusurtemi anir yimdaklir nutsüng-nubur ajungai pei pei yimtsüng ajak ya temenungratsü lima ka küma yanglutsü sentong tajung atongtsüla.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

Tir tasen kumdanga shimtsü Korean arogoi ayongzüker



Bishop Matthias Ri Long-hoon

Seoul, Rongchii/April 06 (Agencies): South Korea nung tematiba court ajanga Tir Yoon Seok-yeol mapa nungi anentsüba sülen linük nung Catholic bishop temi nüburtem dang tir tasenba shimtsü atema pei shisatsü shidak amshitsü ayongzüker.

"Puti otsü teti lephsir, saka tanü asen linük aser nübur temi kodanga maginüba chapter zülutsü mapang tongogo," ta Catholic Bishops' Conference of Korea (CBCK) tir Bishop Matthias Ri Long-hoon ajanga April 4 nü sangdong ka nung ashi.

"Asen puti otsü nung tanaben asen teka agi shimba tir ka mapa nungi anentsütsü asenoki agizükogo," ta Ri-i sangdong nung ashi, koba Yoon-i

mepishiba ya Constitutional Court ajanga magizükba sülen agüja liasü.

2017 küm Park Geun-hye sülen court ajanga South Korea tir teinyakdak mapa nungi anentsür tanabubaji Yoon ya akum.

Arishi küm 64 tain Yoon yagi December 3 nü martial law sangdonga civilian yimsüsüba paidoktsü merangba mechi ozüing yanglur temi mapa nungi khen atema anenja ata. Nüburtemi anema longkak aitba mechi pai mapang tatsüka tsüingta martial law sangdonga aliba agiena liasü. Pa anema ken o benoktsü asoshi parliament nung vote magitepdaktsütsü mechi pai mitkartem yoka liasü.

Ita ishika yimtenren nung

mepetmesü adoka aruba sülen sorkar anema inyakba ken o nung pa apu.

"Tir Yoon Seok-yeol indang ken o jembiba tatem kati aruogo. Aser tang asen linük anitsü asoshi tir tasen ka shimtsü atema asen shisatsü shidak amshitsüla," ta Bishop Matthias-i ashi.

South Korea nunger ozüing nung tir indang election ya anogo 60 tsüingta agitsü shia lir.

Tir indang tashi ya nüburtemi pa nem agütsüba tashi, nübur tenzüksüba tashi aser nüburtem takum aser ki o jen mashi mapang kumzüka ayutsüla ta kanga junga angatetba tir ka shimtsüla, ta Ri-i ashi.

Pai sorkar tashi amshirtem dang nüburtemi tamang katettsüsa aser yimjung ngutettsüsa inyaktsü ayongzüker.

"Talisa yimten yimsüsür temi parnok nübur tenzüksü, kati ka akumtsübotsü aser arok yimchiyimjung asoshi tejakleni anir aotsü aser kati ka tebilemba angatsü imlar. Yamaji shimtetba lenir temi arok ajungtsü asoshi tangatetba nung ochishia aser angatettepa inyaktsü," ta pai ashi.

Korean Catholic Church ajanga nüburtemi shimba lenir ya asen linük nung ochi nung ajemdaker chichiba yimjung asoshi angateta inyakba ka südakjang ta sarasademtsür, ta Ri-isa ashi.

Iran nung Khristanpur lendong nung lir



Tehran, Rongchii/April 06 (Agencies): Iran nung Khristanpur timtem nung lir, kechiaser Islamic Republic ya kin tilatem tamangba yimsü anema inyaksangshi tesashiba akumer, ta human rights activists temi ashir.

Linük yimtiba, Tehran kisüing nunga Khristanpur 300 dak tema reshikangshi tia ajurua lir aser ano nisung 100 shi nem tamangba yimsü mechi tepuokdak mapang talanglang ayutsü obendang agüja lir, ta Center for Human Rights in Iran (CHRI) ajanga ashi.

A n t i - p e r s e c u t i o n organisation, Article 18 ajanga asadangba nung 2024 küm Khristanpur 96 tepuokdak ayutsü obendang agütsüba ya benden nung küm 263 (nisung shia küm 2.7) liasü ta bushitet, koba 2023 küm nisung 22

tepuokdak ayutsü temerenshi agütsüba ya benden nung küm 43.5 (nisung shia küm 1.9) dang nungi timba liasü.

Iran indang Article 500 penal cone kübok tamanger dak teti tenük yoker, kong Islam indang temeshi ozüing den mapet inyaksangshiba mesüra shisaliok agütsüba atema temerenshi tesashi agütsütsü shia lir.

Iran nung Islam, Christianity aser Judaism tamangba yimsü agizüka lir, saka asangsang nung Muslim nunger masürtem nem tenokdangba tesashi agütsür aser merenshir. Ano Islam nungi danga yimsü dangi meyipba ya lendong tulutiba, kong tasüba temerenshi agütsüteter.

CHRI indang executive director Hadi Ghaemi-i ashiba agi, "Iran nung Khristanpur timtem nung lir. Iran ketdangsür

temi Khristanpur pua bener aor aser yimjung nung pei tamangba yimsü amangba mechi tepuokdak küm aika ayutsü nükjidong nung tapi agi national security ken o benoker."

"Iran nung Khristanpur reshikangshia amshiba ya Islamic Republic ajanga civil liberties, tamangba yimsü temeden aser kin tila anema inyakba nung shilem ka lir aser ibaji ajanga nüburtem azüoktsü asoshi tamendak dak jenjang yanglur," ta pai ahsi.

Iran-i Khristanpur aser danga kin tilatem mejungi amshiba ken o ya Mai Sato, UN indang Special Rapporteur for human rights in Iran aser Amnesty International ajanga benoka liasü. Amnesty International ajanga 2023/24 report nung, Iran nung tamangba yimsü tsütsü kin tilatem ozüing aser inyakyim nung bendanga amshir, education, employment, child adoption, political office aser tekülem agiba tesemtem nunga bendanga amshir, ta shia liasü.

Pei tamangba yimsü sülen anidakba yong nisung aika tapi agi apur, kuli tejangja makai temerenshi agütsür, reshikangshia amshir, ta ashi.

ANOGO ABEN TSÜNGREM DEN

Sarasademdak Aser Tenüng Asangdak - T. Ken 122: 1 -9

Tsüngrem kidangi Pa külemi aotsü nai pelar asü? Ken züluri ashir, "Kibuba kidangi asenoki odi, ta ashidang ni pelaa liasü" (t.1). Kijai Kibuba külemdaki aotsü akok.Asenoki anogo shia Kibuba O zünga Pa külemtsü akok. Saka Khristantem kati ka den sendaktepa lir. Asenok Tsüngremer san telok lir. Asenok Pa kidang Par chirtem lir. Anungji Pa kidang Par tanurtemi Pa külemi külemtsübaji jangratsüla.

Tsüngrem kiji Pa tenüng asangdak lir.Tekong 4 nung Israel kini Tsüngrem tenüng asangtsü asoshi Tsüngrem kidangi aoba indang ashir. Asenokia Tsüngrem tenüng asangtsü asoshi Pa kidangi aotsüla, aser asenoki Pa tenüng koda asangtsüla! Chales Spugeoni ashir, "Khristantemi parnok temulung masüba marbel nung zülur aser parnok temoatsütem lisem nung zülur." Tsüngremi asenok nem moatsüba aser asenok asoshi inyakba asenoki yakta amadoker. Na kodang Tsüngrem kidangi odir Pai na asoshi inyakba ajak asoshi Pa tenüng sangang.

Tsüngrem kiji sarasademdak ki lir. Tekong 6 nung ken züluri Yirusalem asoshi sarasademtsü ashir. Tsüngremer nübur aser Yirusalem yimjung asoshi nai sarasademtsüla. Arogo asoshi, lokti asoshi, aser shirnok temaba menden nung lir parnok asoshi nai sarasademtsütsüla. Linük nung azükaru asoshi sarasademtsüla, tanelaren rongsen aser temoatsü asoshi sarasademtsüla. "Na meimertem azükarudakjang" (t.6). Ken züluri Tsüngremer nübur asoshi sarasademtsü. "Kü adianutem aser kü tembartem asoshi, ni tang ashitsü, ne dak yimjung liang" (t.8). Asenoki Tsüngremer nübur asoshi aser parnok tajung asoshi sarasademtsüla. "Kibuba asen Tsüngremer ki atema ni tajungtiba bushitsüla."

Tsüngremer nüburtemi külemi senteper tenüng asangtsü aser Pa dang sarasademdaji Tsüngremi mulungba lir. Kodang nai aji inyakdir, na ajanga Tsüngremi tangar nem Pa tesünep agütsütsü.

Backstreet Boy nungi Brian'er jabasoi American Idol nung 'Hey Jesus' ken aten

Rongchii/April 06, 2025

(Agencies): Backstreet Boys senmanger kati pa Tsüngremi dangi meyipa aoba indang ken ajanga lemsateper.

Backstreet Boys züingsem Brian Littrell'er jabaso aser country ken atener Baylee Littrell-i American Idol nung tamangba yimsü nung ajemdaker pai mejemba ken aten, koba Tsüngrem dak pa tamangtanaben ngutetba indang liasü.

"Hey Jesus" ken atentsü mapang arishi küm 21 tain Littrell-i iba tetoktepba nung tendanger tem dang, "Kü takum nung tensa tamajung ka ajangshiba mapang ni iba ken ya zülü. Ni meima aliba nisung ka asü," ta pai ashi. Pa ya pa tetsü (grandmother) indang jembir liasü, shiba pa indang tembar tajungtiba ta pai züingshir.

"Kübu kidang nungi pilar tesem balala nung ken tena jajadang teti lai aru. Lai ni angatetba ama nisung aikatibo

ni mangatet," ta pai tetsü bilemteta ashi, shiba küm asem tejakdang asü.

"Tang ama mapang nung la küden alitsü südi ta ni bilem, la asütsü ni kodanga meimla. Aser la sür ni kechiserna ajak nung tasüngdangba liasü aser tamang nungi pila. Ni iba tamang kodanga mongutettsü südi ta bilema liasü," ta pai ashi.

Iba "Hey Jesus" ken ya ajanga pai Tsüngrem dak tanaben tamang katet, ta ashi.

Iba ken nung, "Hey Jesus/ I broke my wings again/ could you help me up one last time old friend/ oh cause I surrender everything to you/ Oh, I've tried to fight all my battles without you by my side/ in the dark depths of the night/ it's where I've been without your beautiful light/ oh you gave me wings to fly/ Hey Jesus," ta Littrell-i aten.

Littrell-i Khristan ken atenba atema Idol tendanger Carrie Underwood aser Lionel Ritchie nati tenüingsang agütsü.

AO OSHI ANGAZÜKDAK:**TANÜ ANGAZÜKTSÜBA OJANG****Temdang**

(v) süng ana küma lepdang (cut into two peices)

* Ni süng talangka ana küma temdang apur adok.

Temdangpusa

(n) sentsü tapu balala (stripes)

* Kübui kü nem temdangpusa aliba tula ka alitsü.

OLONG PAITEP # 7115

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPIEN

2. Teburtemi tejak nung awaba - (8)
 6. T _ _ _ em - (3)
 8. Tzüik ayudak - (3)
 9. Nüngdakba dang timba - (6)
 11. Züina ao - (4)
 12. Yangi tzu angur - (5)
 14. Tangar dang nungi tali - (4)
 16. Senyong masü - (6)
 17. Oadokdi - (3)
 18. Tzü tarok - (3)
 19. Yimtaklir aikati iba ya ki den külemi yanglusemer - (8)

LANGTSÜNGLEN

1. Temejangdak - (6)
 3. Nisung ka mapa inyaksü nübo - (4)
 4. Azüntsü asoshi mejemba - (6)
 5. Tesangwa agütsüba - (5)
 7. Tila masü - (4)
 10. Tebenjem tetsür chanu - (4)
 11. Tekolak nung inok - (4)
 12. Tetsüngda - (6)
 13. Tangar inyakba ka inyak - (6)
 14. Tim masü ta ashi - (5)
 15. Asalendong - (4)
 16. Tanü dangtsü - (4)

OLONG PAITEP # 7114 TELANGZÜBA**TIPIEN :**

2. Temerang, 4. Yimra, 5. Jaksa,
 7. Tia 8. Ilang, 9. Arr, 11. Anga,
 12. Akhüm, 13. Süngtsük.

LANGTSÜNGLEN :

1. Sayatenya, 2. Tera,
 3. Rajang, 6. Alaka, 8. Injang,
 10. Akok.

NAI-A YA METETTER MA

April 2, 2025 nü Missouri museum kati "a-peel-ing" Guinness World Record ajatetsü atema nisung 309 anidena shilem agidaksüogo. Iba ya St. Louis nung City Museum ajanga ayongzüka agi aser "most people wearing banana hats" otsü yanglutetogo.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Assam police-i truck driver kümzük; nisungpur 3 apu**Haflong, April 6, 2025****(Agencies):** Assam police-i truck gari anishir ka kümzük aser pa pur aoer nisung 3 apu.

Truck kibur Arun Kumar Sah-i Maibang Police Station nung ken o ka benokba sülen police-i bushisüngdang ka tenzüka liasü.

Police-i Maibang town kübok Subash Nagar tesem nung driver kümzük aser pa pur aoba atema nisung asem apu.

Driver Aldrinton Myllem ya

East Khasi Hills district kübok 45 Kul nung lir. Pa ya March 31 nü Maibang police station kübok Longkhor village anasa NH 27 nungi pur aoba liasü.

Arun Kumar Shah-i ashiba agi pai Mongulbarnü Myllem den jembitsü merang saka pa indang phone switched off ser liasü.

"Memetetba nisung kati kü den jembi aser pai pa DIMASA NATIONAL ARMY nung züngsem ka ta ashi. Pai driver chioktsü atema Rs. 10 Lakhs

meshi. Iba nisung yagi tashi mangara driver tepsettsü aser gari rongdoktsütsü ta amokmeren" ta Arun-i police dang ashi.

Iba atema bushisüngdang ka tenzüka aser nisungtem maitsü jangjatsü merang ya Dima Hasao Addl. SP (Crime)-i ashi.

Police-i prangpong kar ngutetogo saka tang tebushidak asünung tanga osang kecha mashitsü ta Addl. SP (Crime)-isa ashi.

Manipur nung rabies atema dog vaccination drive agir**Imphal, April 6, 2025****(Agencies):** Manipur nung Churachandpur district ketdangsürtemi New Zoveng yimtsüng nung dog vaccination campaign ka tenzüko. April 4, 2025 nü iba yimtsüng ya containment zone ta sangdongogo.

State Veterinary Department nungi Quick Response Team (QRT) kati rabies agi tonga aliba yimtsüng semdang aser kidang metsüba

azü ajak nem mozü agütsüogo. Tan hopta tetenzüklen New Zoveng yimtsüng nung nisung ka azü agi angoba sülen rabies agi shirangba asüba sülen iba mapa inyak.

New Zoveng nung rabies aika putetba sülen district ketdangsürtemi tenokdangba aika agütsüogo. Parnoki iba yimtsüng nungi azü bener aoba mesüra tangalen nungi bener aruba noktanga lir.

Külen, tanga veterinary team

kati Henglep subdivision kübok Mongken village semdangogo. Iba yimtsüng nunga tawa tu tanur tetsür ka rabies agi asü.

"Onok atema tebilemtsü tulutibaji anti-rabies vaccines peria maliba lir" ta District Veterinary Officer Dr. Veithienneng-i ashi.

K e t d a n g s ü r t e m i yimdaklirtem dang kümdanga alitsü aser shirurutem anasa maotsü metetdaksüogo.

Margherita nung Ram Navami mapang apuani 32 kibong aküm**Imphal, April 6, 2025****(Agencies):** April 6, 2025 nü Margherita Tea Estate nung Shri Shri Ram Navami benjung kanga longsoa mungogo.

Iba benjung nung sobaliba külemküjaba dang masü saka lokti kiyimba sentong ka agiogo.

Ram Navami ya Lord Rama asoba anogo tenüng nung amunger aser Sanatan Dharma sobaliba nung balaka züngshir.

Margherita, Dirok, Namdang Tea Estate, aser Lama Gaon nungi Hindu Tea Tribes den külemi Margherita jila nung

alirtemi iba benjung ayongzüka amung.

Iba benjung nung tekülemer nisung 5,000 temai yimdong süa senzüa liasü. Sentong agidak lokti kiyimba shilem agidang apuani 32 tashi kibong aküm.

Manipur police-i prangpong-injang aika apu**Imphal, April 6, 2025****(Agencies):** Manipur Police Commando-i Honibarnü Imphal East district nung prangpong-injang aika puogo.

Imphal East District kübok Keirao Wangkhem yimtsüng nung parnoki mita aodang prangpong-injangtem apu.

Iba tesem nung Carbine Sten Gun, 9 mm Pistol, .22 Rifle, 12-Bore Single Barrel Gun, 36 Hand Grenade, 7.62 mm AK-47 live ammunition, 9 mm live ammunition, .32 live ammunition, 12-Bore Barrel



live ammunition, 5.56 mm INSAS magazine, Tube launching, Tear Smoke shell soft nose (SR), Tear Smoke

shell soft nose (LR), Tear Smoke shell, Stun shell (Anti-Riot), Tear Smoke shell aser Radio Wireless set ngutetogo.

Menungra Bilemteter



Late K. Alem. (Changki)

Temeim Oba, Onok taküm nung na mali tanü küm ka ajunger. Na onok den meliaka asenok lia aruba anogotem aser nü temeim sayutsüangi otem aser mapa tajungtem onok mulungjang nungi kodanga mepilar.

Tanü na onok den meliaka onoki iba anogo na menungra bilemteta sarasadema amonger.

Temeim Kinungtsü, Jala, Jabaso aser Kinungertem.

Russia-i Ukraine yimtiba nung bomb pokloktsü



US-i South Sudan nunger indang visa ajak thitsü

Washington, Rongchii/April 6 (Agencies): Secretary of State Marco Rubio-i, Washington-i South Sudan nunger passport bena alirtemi bena aliba visa ajak thitsüogo, ta ashiba den Sudan sorkari par nūburtem meyipa yokba magizükba aser United States-i temeim sayuba atema angaka aoba atema parnok aija liasü.

"Linük ajaki United States aser tanga linüktemi pei nūburtem meyipa yokba mapang shitak nung agizüktsüla," ta Rubio-i ashi.

"South Sudan indang transitional sorkari iba inyakyim ya akümtsübu masür."

Rubio-isa, US-i, passport bena aliba South Sudan nungertem United States-i

maitdaksütsü atema Visa magütsütsü, ta ashi.

Tir Donald Trump-i mapa agizükba sülen tang mezüngbuba linük ka nungi passport bena alirtem anema iba jenjang agiogo. Pa election atema nüboyimba mapang anti-immigration onük dak ajemdaker nüboyima liasü.

South Sudan nunger nem Joe Biden indang administration-i "temporary protected status" (TPS) agütsür liasü. Iba ya taküm May 3 nü tembangtsü liasü.

US-i agütsüba TPS yagi bendanger shirnoki rara, lendong balala aser tanga tatalokbatem ajanga pei linüki meyipa moteti ali parnok meyipa yoktsü nungi kümzüka toktsür.

(Maneni tapak 8 nung...)

Kyiv, Rongchii/April 6 (Agencies): Russia-i anüng ajanga Kyiv aser linük anüotiplen tesem kar amakba sülen nisung ka tepset aser aika yirutsüogo. Tir Volodymyr Zelenskyy-i pa soa ainba yimti maka tanur 9 densema nisung 18 tepsetba atema United States-i telangzüba tesashi ka magütsüba atema parnok aitsüba sülen iba ya ataloka liasü.

Kyiv Mayor Vitali Klitschko-i ashiba agi, Deobar anepdang linük yimtiba anüng ajanga amakba sülen district asem nung nisung maliba kitem nung mi adok aser nisung ka tepsetba den asem yiruja liasü.

Tanga osang ka ajanga southern Mykolaiv region governor Vitaliy Kim-i ashiba

agi, Russia-i Honibar aonung 10 ako shi nung missile ka yok aser iba ajanga ki aika raksatsüba den nisung pezü yiruja liasü.

Kyiv nungi Al Jazeera osangbener Zein Basravi-i ashiba agi, "Russia-i osang tejangja ka yokdar. Ner kishizüing nung rara lir ta metetdaksüner, aser iba ya nūburtem tsübudaksütsü atema lir."

Multi-storey building teraksa ka kima nokdaker Basravi-i ashiba agi, Kyiv yamai sashia mapang tatsüka memaki liasü, aser nūburtem aliba ki timba bomb tesashi apokba wave ajanga raksaja liasü.

Air force-i tekümdangtsü metetdaksüba sülen Poland den arrtsü nung aliba tesemtem densema linük ajunga nung

anepdang 2 ako nungi air alert agüja liasü. Poland-ia tayimtsütem yoka liasü.

Poland military-i ashiba agi, Russia-i arrtsü adena Ukraine anüolen long-range missile tem khaloktsüba sülen allied forces aser parnoki kümdangshia atatsü asoshi anüangi tayimtsütem yok aser ali nunga air defence systems ka küm kümshia atadakja liasü.

Ukraine indang air defence unit temi Russia-i yokba missile 23 nungi 13 aser drone 109 nungi 40 khadanga liasü, ta air force-i Deobarnü ashi.

Kasa mapang nung Russian Ministry of Defence-i ashiba agi, parnoki Kursk, Belgorod aser Rostov tesem nung Ukraine-i yokba drone 11 khazüka yokogo.

Myanmar menoknok lendong nung asür nisung 3,471 jungogo

Naypyidaw, Rongchii/April 06 (Agencies): Menoknok agi kongshir aliba Myanmar linük tesem kar nung tzüinglu kanga sashia aruba ajanga teyari maparen tali tebenjaba kumdaksür aser tashidak tamajung tali adoktsü tensa bener arutsür, kong March 28 menoknok nung asür nisung 3,471 jungogo.

Iba menoknok indang epicentre anasa tesashitiba kongshiba Mandalay yimti nung teyariteper temi Deobarnü ashiba agi, tzüinglu aser mopung agi yasüing aser tanep süki nung kongshia yangji jenoka alirtem aser parnok meyong osettsüset ajunga metenogo.

Ano tzüinglu tali arutsü imlar aser temperatures ya 37 degree Celsius (98 degrees Fahrenheit) atongtsü sayur.

Mapang masüadang tzüinglu aruba den kanga atsükba ajanga saksüpokshi densema tashidak balala poktetsü, ta United Nations Development Programme ajanga ashir.

Nisung million 50 aliba Myanmar nung menoknok magnitude 7.7 anoka linük yimtiba Naypyidaw densema regions aser states trok nung

teraksa tulu bener arutsü.

Iba menoknok ajanga tesem aika nung power, telephone mesüra mobile phone connections, lenmang aser apu tem raksaja iba lendong nung akoksaba ajak asadangtsü tasak akum. Ano linük nung civil war ajanga nisung million asem dak tema pei ki yutsür tesem balala nung jenoka aliba tia tamajungba kumdaksü, ta UN ajanga ashi.

Mitkari aniba linük nung state media ajanga ashiba agi, iba menoknok ajanga nisung 3,471 süogo, nisung 4,671 yiru aser nisung 214 samar bushir ta ashi.

Iba menoknok ajanga ki 5,223, school 1,824, pagodas aser tekülem ki 4,817, mozüki aser clinic 167, apu 169, tzü nokdang 198 aser linük indang tongti highway shilem 184 raksatsüogo.

Teraksatsüba ya Sagaing yimti nung tali liasü aser ano Myanmar nung yimti tulutiba jenjang tanabuba nung aliba Mandalay nunga kanga sashia kongshi.

UN aid tekolakba Tom Fletcher shiba Mandalay nung lir, pai iba menoknok ajanga raksatsüba ya khenyongi

balaka ta ashi aser takum jenbua alirtem aoksakanger aser tetsübo nung lir aser parnk chiyongtsü, tzü, jenokdak tesem aser electricity tangsa nüngdaker, ta shi.

Fletcher-i X nung video ka lemsatepba nung timtem ajurua alidak ano iba menoknok lendong yagi tesamatsüba tulu bener arutsü, ta ashi. "Timtem ya manener. Tang menoknok, aji masüadang rara, aji masüadang teyari nüngdaka liasü," ta pai ashi.

Menoknok anoker hopta ka dak tali aftershock maneni lir, ta pai ashi. Hokulbar aonunga Mandalay south tsütsü ano menoknok magnitude 4.7 anok ta United States Geological Survey ajanga ashi.

2021 küm February ita Aung San Suu Kyi-i aniba civilian sorkar atsüingdoker yimsü süa aruba Senior General Min Aung Hlaing indang military government-i Bodhbarnü khen atema ceasefire sangdongaka army temi par yimsüsüba meyariba tesemtemi teyari oset bener aoba nokdang, ta UN Office of the High Commissioner for Human Rights ajanga

Hokulbarnü ashi.

Ano ceasefire tenzüker mitkar temi parnok anemer amakba indang bushisüngdang südar, ta UN agency ajanga ashi.

Teyari agütsüba telok, Free Burma Rangers ajanga osangbener dang Honibarnü ashiba agi, ceasefire sangdonga liaka mitkar temi Karenni aser Shan state tem nung Brehostibarnü aser Hokulbarnü bomb pokloktsü aser nisung pongu tepset.

Asürtem rongnung civilian tem densema lir aser ceasefire tenzüker mitkari yamai amakba tenetben lir, ta iba telok tentetsang David Eubank-i ashi.

Iba tatalokba indang mitkar nungi telangzüba kecha agüja mali.

China, India aser Southeast Asian linüktem ama Myanmar kidanger temi taoba hopta linüki teyari oset aser teyariteper yoka lir, aser tawa tashi alima nung humanitarian donor tematiba jenjang nung aliba US-i menoknok agi kongshia aliba nūburtem nem teyari sen \$9 million agütsütsü nangzüka lir.

Linük indang foreign aid

programme loksaba ajanga teyari asoshi telangzüba agütsüba nung kongshir, ta tang aser taoba mapang US ketdangsür inyaker temi ashir.

Menoknok anoker Myanmar-i aruba US Agency for International Development nung inyaker nisung asem meyipa yok, ta taoba mapang USAID ketdangsür Marcia Wong-i ashi.

"Iba team ya tesüingmangtsüka meranga inyaker, nüngdakba pur nem humanitarian aid agütsütsü rangloker inyaker. Yamaji lia na mapa nungi anentsür ta osang angazük nung nai komaka bilemtsü?" ta Wong-i ashi.

USAID workers asem ya menoknok anokdak yimtung nung mejanga mapa inyaka liasü, aser parnok mapa nungi anentsüba yagi ita ishika tsüingta metettsü, ta Wong-i ashi.

Kidanger Thailand linük nung menoknok ajanga asür nisung 24 jungogo, ta ketdangsüri ashir. Item rongnung par 17 linük yimtiba Bangkok nung skyscraper teyangludak ka chirepba nung asü. Ano nisung 77 samar bushir.

Mokokchung District Sports Council pur lokti senden kaogo



Mokokchung, Rongchii/ April 6 (TYO): Mokokchung District Sports Council (MDSC) pur 5th April, 2025 nü Yimchalu yimdak lokti senden takok ngua kaogo, ta MDSC sangdong ka ajanga metetdaksü.

Mokokchung Deputy Commissioner, shiba MDSC

nunga President lir, pai iba lokti senden ketdang süa ani, aser pai MDSC kübok aliba telen balala dang mapang ajak nung pei tata shilem nendaka inyakba asoshi pelaba metetdaksü. Paisa senden nung adenertem dang saisabong tsütsü lanu putu tsükdakradang kecha meli-i

satok satoka renloksü asoshi meranga inyaksü ajungshi.

Kasa senden nung MDSC Vice President, Martoshi-i Mokokchung district nung saisabong balala rendaktsütsü asoshi onük kar benok, aser MDSC treasurer, Imlitoshi Walling-ia shilem agia jembu.

Charleston Open: Pegula aser Kenin na final asayatsü

Rongchii/April 6, 2025 (Agencies): Honbarnü Charleston Open semi-final asaya nung top seed Jessica Pegula-i 6-2 2-6 7-5 agi Ekaterina Alexandrova koka, taküm asayamung pezübuba final tongtetogo.

La final nung külem America tsür Sofia Kenin dena sayatsü jangjaogo.

Pegula-i asaya kanga junga tenzüik aser mezüngbuba asaya pongu atonga akok, saka tanungba asayatem nung Alexandrova akoktsü atema jenjang balaka nung kanga dang junga asayatsüsa aküm.

Honibarnüsa Kenin aser Amanda Anisimova na tanga

semifinal asaya ka asayatsü liasü, saka mezüngbuba set nung Amanda yiruba sülen Kenin-i asaya koka final tongtetogo.

Asaya nung Pegula-i mezüngbuba game nung Alexandrova indang serve break asü aser iba sülen game tasembuba nunga Alexandrova-i double fault menaba sülen ano Pegula nem la indang serve break südakja asaya kokdaksü.

Iba sülen tanabuba set nung Russia tsüla yagi asendenshir tajungba asaya aser lai game trokbuba nung Pegula indang serve break asü aser ano set point nung aliba mapanga serve break süa liasü.

Tasembuba set nung Pegula-

i game 11buba nung Alexandrova indang serve break süa lai asaya 7-5 agi koka liasü. Tena tsünga ghonda ana ser minute 21 asaya liasü.

Iba asaya akokba densema Pegula-i taküm ajak senteper asaya 24 kokogo.

February ita Doha nung asayamung ka akokba sülen Anisimova maneni tashi ita asayayonga aotsü imla liasü, saka la yiruba ajanga masayatetsüsa aküm.

Charleston Open ya North America nung tetsür dang asayaba asayamung tulutiba lir aser 1990 küm sülen tang mezüngbuba final nung America tsür ana asayatsü lir.

Jasprit Bumrah Mumbai Indians squad nung denogo



Rongchii/April 6, 2025 (Agencies): India nung nungtungu fast bowler Jasprit Bumrah Mumbai Indians squad nung denogo aser iba ajanga club fan tem kanga pelatepdar. Pa MI tenüng nungi taruba asaya nungbo asayatsü imlar.

IPL ponguben koker aliba team yagi iba osang ya Deobarnü parnok indang social media sabang balala ajanga lemsatep aser video ka den "Ready to Roar" ta caption

agütsür lemsatepa liasü.

BCCI indang Centre of Excellence (CoE) nung mapang tatsüka temang anepaluba sülen ajaki kanga yonga aliba ama Bumrah asayatsü meyipa aruogo. Pa taküm IPL nung tang tashi nung khien danga asaya mali.

Hokolbarnü Lucknow Super Giants den asayatsü atema toss asayaba mapang o jembidang captain Hardik Pandya-i, Bumrah takaratiba nung

meyipa arutsü akok ta shir liasü. "Jasprit yakta meyipa arutsü," ta pai ashi.

Bumrah meyipa aruba ya Mumbai Indians atema anisüngzüik tulu lir, shirnok 2025 IPL nung junga masayateti arudar. Pa team nung adenba ajanga bowling tashi taitba kümdaktsüba dang masü pa ya lenir tajung ka lir.

MI pur taoba mapang ama masayateti arudar aser Bumrah aruba ya parnok asoshi temelenshi mapang ka asütsü imlar. Pai Yorker kanga junga aonba, pressure nung süngjema asayatetba aser asaya melenshidaktsütsüsa ball ontetba atema kanga nungtungu lir, anungji arishi küm 31 tain asayar ya MI pur temaba jenjangi atutsü merangba mapang kanga tongtibang asütsü.

Mumbai pur taruba asaya Royal Challengers Bengaluru den Hombarnü Wankhede stadium nung asayatsü lir.

Esha Singh-i Buenos Aires World Cup nung silver angu


Rongchii/April 6, 2025 (Agencies): 2023 Hangzhou Asian Games nung 10m Air Pistol aser 25m Pistol event nung silver medal ana anguba sülen küm ana lir arishi küm 20 tain Esha Singh-i ISSF World Cup nung tang mezüngbuba medal ka nguogo.

Buenos Aires, Argentina nung ISSF World Cup nung Edha-i tetsür 25m Pistol final nung silver medal nguogo.

Final asaya nung Paris Olympics 10m air pistol bronze medallist Manu Bhaker, aser Paris Olympics 25m Pistol bronze medallist Veronika Major nata densema liasü, saka Esha-i süngjemshir asaya-a item asayatem ajak ajatetogo. Final nung mezüngbuba series sülen la tenetbuba nung liasü saka meyipa tu la China tsür Yujie Sun sülen tanabuba jenjang nung tembanga liasü.

Asian Games silver medalist yagi India atema 10m event nung Olympic quota ka ngutsür liasü. Ajisüaka Olympic trials sülen la Paris Olympics nung 25m Pistol asaya nunga shilem agitsü shima liasü. Esha ya küm asem tejakdang nungi coach Ved Prakash Pilonia aser Raunak Pandit na tawabangba kübok 25m asaya nung shilem agia arudar.

10m aser 25m pistol event ya mesükteper, saka technical tsütsü balala lir. Manu Bhaker densema shooter tem aikati



asaya anaprongla nung asaya aruogo. 25m pistol atema trigger weight 1000g nungdaker, koba air pistol den medemdangra 500g dang, front sight aser barrel tatsüba aser grip khenyongi balaka lir.

Taoba küm asem tsünga Esha domestic trials aser international asayamungtem nung teti asaya aruogo. Coach Pilonia-i ashiba agi, Esha-i asaya anaprongla nung bendanga agüja asayaba ajanga Buenos Aires nung takok tajung ngutetogo.

Honibarnü qualification nung la tekububa nung tembanga liasü. Final nung mezüngbo China tsür Yujie Sun aser Sixuan Feng na den Bhaker tejakdang liasü saka Esha bo junga masayateti timtema liasü.

Ajisüaka Bhaker-i junga masayatet aser la shoot-off ka sülen trokbuba nung tsükatok. Series pongu nung shot 25 nung anaben dang mekashiba sülen Esha jenjang junga kuma liasü. Lai point 35 ngua gold medalist Yujie Sun sülen tanabuba jenjang nung tembang.

Mourinho asaya asem atema nokdang

Rongchii/April 6, 2025 (Agencies): Turkish Cup asaya ka sülen Fenerbahce coach Jose Mourinho-i, Galatasaray manager Okan Buruk indang teni nung metsük atema pa nem asaya asem atema tenokdangba agütsüogo.

Sukru Saracoglu Stadium Bodhbarnü asaya tembangba sülen iba ya ataloka liasü. Galatasaray-i goal 2-1 akokba sülen manager anaprongla match ketdangsürtem den sensaksemba mapang iba ya ataloka liasü.

Mourinho-i tesülen nungi oa Buruk indang teni nung metsük

aser taoba mapang Turkey international midfielder yagi pa tejak nembanger ali nung longdaka liasü.

Taoba mapang Chelsea, Manchester United aser Tottenham coach dang ya ano senchi Turkish Lira 292,500 chiogo. Buruk dak teka sangshiba atema Galatasaray-i Mourinho aitsüogo.

Kasa mapang nung Fenerbahce-ia, Buruk-i pa dak injang khaloktsü ama acting asüba atema pa aitsüogo aser ashiba agi pai Mourinho rongmesotsü atema yimya tamajung benschia liasü.

BENDANGLI OSANG : Tapak 7 nungi...

US-i South Sudan nunger indang visa...

"South Sudan-i kodang teka amteper inyakdir idangji Washington-i tang agiba jenjang ya lepa reprangshitsü," ta Rubio-i ashi.

Tawa sorkar sepaitem aser parnok anemertem rartepba ajanga South Sudan nung tensa mejungi kumogo. Ken o asadangertemi ashiba agi, iba ajanga civil war tenzüksütsü

akok, koba ajanga 2013 küm nungi 2018 küm tashi nung nisung 400,000 tepsetogo.

United Nations Secretary-General Antonio Guterres-i taoba hopta regional aser international lenirtem dang South Sudan nung tanaben civil war metenzükshidaktsütsü atema jenjang agitsü mepeshia metetdaksüogo.

BILEMDANGANG

"Angati anguba rongsen taolen memeteter."